



Sud Bosne i Hercegovine
Суд Босне и Херцеговине

Broj; S1 3 Iž 039715 21 Iž
Sarajevo; 09.02.2021.godine

Sud Bosne i Hercegovine, u drugostepenom vijeću sastavljenom od sudija Zvezdana Antonović, kao predsjednika vijeća, Mirsade Džindo i Vesne Trifunović, kao članova vijeća, odlučujući o žalbi političke stranke KOALICIJA MOJA ADRESA SREBRENICA (SDA-SBIH-SBB-PDA) stranka sa sjedištem u Sarajevu ul. Mehmeda Spahe br. 14, koja osporava odluke Centralne izborne komisije Bosne i Hercegovine, broj: 05-1-07-1-378-1/21 od 02.02.2021. godine, o raspisivanju i održavanju ponovnih izbora za načelnika Općine Srebrenica i Skupštinu općine Srebrenica, na nejavnoj sjednici održanoj dana 09.02.2021. godine donio je

R J E Š E N J E

Žalba se odbija kao neosnovana.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, raspisani su ponovni izbori za načelnika Općine Srebrenica i Skupštinu Općine Srebrenica na 26 redovnih biračkih mjesta i dva biračka mjesta za glasanje birača u odsustvu iz drugih osnovnih izbornih jedinica za osnovnu izbornu jedinicu Srebrenica.

Protiv ove odluke žalitelj je izjavio žalbu i to zbog pogrešne primjene materijalnog prava i zbog nepotpuno i netačno utvrđenog činjeničnog stanja, te je predložio da se ista usvoji, a da Centralna izborna komisija Bosne i Hercegovine donese novu ili izvrši dopunu postojeće odluke o poništavanju i raspisivanju i održavanju izbora i putem pošte u Izornoj jedinici Srebrenica za nivo načelnika općine Srebrenica i Skupštine općine Srebrenica, te da se izvrši verifikacija i brojanje svih pristiglih koverti sa Biračkim materijalima za osnovnu izbornu jedinicu Srebrenica koji se nalaze u skladištu Centralne izborne komisije Bosne i Hercegovine i koji će biti objedinjeni sa konačnim rezultatima za ovu izbornu jedinicu.

U obrazloženju žalbe žalitelj navodi da je podnio prigovor Centralnoj izornoj komisiji Bosne i Hercegovine zbog loše procjene utvrđivanja rokova za blagovremeno izjašnjavanje birača koji glasaju putem pošte, čime su ovi birači onemogućeni da

ostvare svoje biračko pravo u skladu sa Izbornim zakonom Bosne i Hercegovine. Nadalje navode da je prema odgovoru JP Pošta Sarajevo vidljivo da su glasački paketi biračima u inostranstvo dostavljani počev od 15.10.2020.godine što je 15 dana zakašnjenja od propisanog roka od 45 dana prije dana održavanja izbora. Nadalje navodi da je cijeli proces kasnio 15 do 30 dana i neki glasački paketi nisu upućeni van BiH čak ni do dana izbora, dok su neki na adrese stizali nakon dana održavanja Lokalnih izbora 2020.godine. Navode i da se na izvodu iz Centralnog biračkog spiska za općinu Srebrenica nalazi 2419 birača, dok je Centralna izborna komisija BiH izvršila verifikaciju oko 1400 koverata pristiglih do predviđenog roka 25.11.2020.godine. Na navedeni način je velikom broju građana Srebrenice onemogućeno da ostvare svoje biračko pravo. Isto tako navode da će ponovni izbori biti održani 21.02.2021.godine, te da nema zakonskog osnova da se glasački listići koji su uredno pristigli nakon 25.11.2020.godine ne verifikuju i ne izbroje, te uvrste u konačne rezultate. Navode i da bi 1000 neprebrojanih glasova pristiglih putem pošte sigurno uticalo na izborni rezultat u Srebrenici.

Centralna izborna komisija Bosne i Hercegovine dostavila je ovom sudu odgovor na žalbu, te je predložila da se ista odbaci kao nedopuštena iz razloga što je apelacioni odjel Suda BiH svojim rješenjem, broj: S1 3 Iž 039618 21 Iž od 26.01.2021.godine, odbio žalbu žalitelja sa identičnim navodima kao neosnovanu, a ukoliko se ista ne odbaci predlaže da se žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda BiH je zaključilo da je žalba dopuštena, ali da ista nije osnovana, a iz slijedećih razloga:

Iz stanja spisa proizilazi da je ovaj Sud svojom odlukom, broj: S1 3 Iž 039618 21 Iž od 26.01.2021.godine odlučio po žalbi izjavljenoj na odluku Centralne izborne komisije Bosne i Hercegovine, broj: 05.-1-07-1-95/21 od 21.01.2021.godine o poništavanju Lokalnih izbora održanih dana 15.11.2020.godine u izbornoj jedinici Srebrenica za nivo načelnika općine Srebrenica Skupštinu općine Srebrenica na 28 biračkih mjesta.

U konkretnom slučaju, žalba je izjavljena protiv odluke: 05-1-07-1-378-1/21 od 02.02.2021. godine, kojom odlukom je odlučeno o raspisivanju i održavanju ponovnih izbora za načelnika Općine Srebrenica i Skupštinu općine Srebrenica o kojoj odluci nije odlučivano u predmetu broj: S1 3 Iž 039618 21 Iž od 26.01.2021.godine, pa je stoga žalba dopuštena.

Međutim, žalba nije osnovana.

Iz stanja spisa proizilazi da se navodima žalbe faktički pobija pravilnost odluke Centralne izborne komisije Bosne i Hercegovine od 21.01.2021.godine, kojom su poništeni izbori održani dana 15.11.2020.godine u izbornoj jedinici Srebrenica i o kojoj žalbi je donesena odluka ovog Suda, tako što je žalba odbijena i potvrđena odluka o poništavanju izbora od 21.01.2021.godine.

Obzirom da se ovom žalbom u ovom predmetu pobija odluka Centralne izborne komisije Bosne i Hercegovine o raspisivanju i održavanju ponovnih izbora od

02.02.2021.godine, koja je donesena na osnovu pravosnažne odluke Centralne izborne komisije Bosne i Hercegovine, broj: 05-1-07-1-95/21 od 21.01.2021.godine, to je ovaj Sud ispitao žalbu u pogledu pravilne primjene materijalnog prava, te zaključio da je ista neosnovana.

Uvidom u dispozitiv odluke o poništenju izbora, kao i u dispozitivu odluke o raspisivanju izbora, utvrđeno je da je pobijana odluka donešena u svemu identično sa dispozitivom odluke o poništenju, što znači da je ista samim tim i pravilna i zakonita.

Kako je odluka o poništenju izbora postala pravosnažna, to znači da se njena zakonitost u ovom postupku ne može preispitivati, jer pravosnažnost odluke podrazumijeva i njenu zakonitost.

Dakle, žalba je neosnovana iz razloga što je pobijana odluka donesena u potpunosti u skladu sa odlukom o poništenju izbora i na osnovu ovlaštenja koja su data Centralnoj izbornoj komisiji Bosne i Hercegovine citiranim odredbama Izbornog zakona.

Iz navedenih razloga apelaciono vijeće nalazi da je pobijana odluka Centralne izborne komisije Bosne i Hercegovine pravilna i zakonita, a žalba neosnovana, pa je istu primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, br. 19/02, 88/07, 83/08 i 74/10) valjalo odbiti.

**PREDSJEDNIK VIJEĆA
S U D I J A**

Zvezdana Antonović